



Djela kojima se štiti od Vatre i postiže Džennet (Meka)

Hatib: dr. Mahir ibn Hamed el-Muajkili

8. ševal 1447. po Hidžri / 27. mart 2026.

Hvala Allahu, Koji je jedinstven u veličini i uzvišenosti, i Koji Svojim stvorenjima daruje obilne blagodati. Njemu zahvaljujem i Njemu se obraćam kajanjem, od Njega oprost tražim.

Svjedočim da nema istinskog boga osim Allaha, Jedinog, Koji nema sudruga; On Svoje robove upućuje ka pokornosti i pomaže im u tome. I svjedočim da je naš vjerovjesnik i prvak Muhammed Allahov rob i Njegov poslanik; najbolji učitelj propisa vjere i onaj koji ih je najjasnije pojasnio. Neka su Allahovi salavati i selam na njega, njegovu porodicu, njegove ashabe i njegove supruge – ljude upute i imana – kao i na sve one koji ih slijede u dobru, do Sudnjega dana.

O vjernici, savjetujem i sebe i vas da se Allaha bojimo. Budite bogobojažni ustrajno čineći dobra djela i kloneći se zabrana; jer uspio je onaj ko se drži bogobojažnosti, a propao i izgubljen je onaj ko slijedi svoje strasti. Uzvišeni kaže: "O vi koji vjerujete, bojte se Allaha i neka svako gleda šta je za sutra pripremio; i bojte se Allaha, jer Allah dobro zna ono što radite." (El-Hašr, 18)

O ummete islama!

Istinski uspjeh kojem teže razumni i čestiti ljudi jeste da se spase od Vatre. Jer, kako je rekao Poslanik, sallallahu alejhi ve sellem: "Svaki čovjek osvane pa prodaje svoju dušu: ili je oslobađa ili je upropaštava."

A potpuni uspjeh biva samo ulaskom u Džennet, kao što Uzvišeni kaže: "Onaj ko bude udaljen od Vatre i uveden u Džennet – taj je uspio. A život na ovom svijetu samo je varljivo uživanje" (Ali Imran, 185).





Na ahiretu nema treće kuće: ili je Džennet ili je Vatra. Riječ "udaljen" (zuhziha) ukazuje da je za to potrebna borba, trud i strpljenje, jer je Vatra – Allah nas i vas od nje zaštitio – okružena strastima, a strasti privlače dušu, pa se čovjek teško od njih odvaja osim uz napor.

Ebu Davud bilježi da je Poslanik, sallallahu alejhi ve sellem, rekao: "Kada je Allah stvorio Vatru, rekao je: 'O Džibrile, idi i pogledaj je.' On je otišao, pogledao je, zatim se vratio i rekao: 'Gospodaru moj, Tvoje mi veličine, niko za nju neće čuti a da neće ući u nju.' Tada ju je okružio strastima, pa je rekao: 'O Džibrile, idi i pogledaj je.' On je otišao, pogledao je, zatim se vratio i rekao: 'Gospodaru moj, Tvoje mi veličine, bojim se da niko neće ostati a da u nju neće ući.'"

Poštovani vjernici!

Kao što je Allah učinio mjesec ramazan vremenom oslobađanja od Vatre, tako je, iz Svoje plemenitosti, pripremio Svojim robovima dobra djela pomoću kojih se mogu spasiti u svim mjesecima. Najuzvišenije od tih djela jeste tevhid – iskreno obožavanje Allaha. Poslanik, sallallahu alejhi ve sellem, rekao je: "Allah je zabranio Vatri onoga ko kaže: 'La ilahe illallah', želeći time Allahovo lice." (Buhari i Muslim)

Jedno od tih djela jeste i čuvanje namaza; jer je namaz jedan od najvećih uzroka spasa od Vatre, naročito sabah i ikindija. Poslanik, sallallahu alejhi ve sellem, rekao je: "U Vatru neće ući onaj ko klanja prije izlaska sunca i prije njegovog zalaska" (Muslim) – misleći na sabah i ikindiju. A ko ustraje u klanjanju četiri rekata prije podne i četiri poslije njega, Allah će ga zaštititi od Vatre.

Post je štit i snažna zaštita od Vatre. Kada prođe ramazanski post, ostaje dobrovoljni post: šest dana ševvala, post ponedjeljkom i četvrtkom, te tri dana svakog mjeseca. A najbolji post je post Davuda, alejhis-salam – da se jedan dan posti, a drugi dan ne posti.

Poštovani vjernici!

Jedan od uzroka spasa od Vatre jesu lijep ahlak, blagost i lijepo ophođenje prema ljudima. O ti koji želiš spas od Vatre: budi plemenit u ophođenju, blag i susretljiv





prema svojoj braći, vedra lica i strpljiv prema njima. Ibn Mesud, radijallahu anhu, prenosi da je Poslanik, sallallahu alejhi ve sellem, rekao: "Hoćete li da vas obavijestim o onome kome je Vatra zabranjena? Svakom bliskom, blagom i lahkom čovjeku." (Tirmizi)

Onaj kome Allah podari kćeri ili sestre pa se prema njima lijepo ophodi, budu mu zaštita od Vatre. Poslanik, sallallahu alejhi ve sellem, rekao: "Ko ima tri kćeri ili tri sestre, ili dvije kćeri ili dvije sestre, pa se prema njima lijepo ophodi, bude strpljiv s njima i boji se Allaha u pogledu njih – ući će u Džennet." (Ahmed)

U drugoj predaji stoji: "Ko ima tri kćeri, pa ih zbrinjava, sažalijeva, izdržava i brine o njima – njemu je Džennet obavezan." Neko upita: "A ako ima dvije?", a Poslanik odgovori: 'I dvije.' Neki su kazali: 'Da su pitali i za jednu, rekao bi i za jednu.'

O vjernici!

Nemoćan je onaj ko je nemoćan da dovi. Učestalo traženje od Allaha da nas oslobodi od Vatre jedan je od uzroka spasa. Poslanik, sallallahu alejhi ve sellem, rekao je: "Ko tri puta zatraži od Allaha Džennet, Džennet kaže: 'Allahu, uvedi ga u Džennet.' A ko tri puta zatraži zaštitu od Vatre, Vatra kaže: 'Allahu, zaštititi ga od Vatre.'" (Tirmizi)

Uzvišeni je opisao Svoje odabrane robove: "A robovi Milostivog su oni koji po Zemlji smireno hodaju, a kada im se neznalice obrate, odgovaraju riječima mira; oni koji noći provode pred svojim Gospodarom, čineći sedždu i stojeći; i oni koji govore: 'Gospodaru naš, udalji od nas kaznu Džehennema, jer je njegova kazna stalna; doista je on ružno boravište i prebivalište.'" (El-Furkan, 63–66)

Allah nas i vas od njega zaštitio.

O vjernici, kao što vjernik traži djela kojima će postići spas od Vatre, tako se mora čuvati onoga što vodi u nju. Najviše što ljude baca u Vatru na njihova lica jesu plodovi njihovih jezika, kako nas je obavijestio Poslanik, sallallahu alejhi ve sellem. Jer grijesi jezika ruše međuljudske odnose, kvare ljubav, šire mržnju i razjedinjuju ljude – posebno u vremenu savremenih sredstava komunikacije kojima mnogi ne pridaju pažnju.





Zato je šerijat zabranio ogovaranje i prenošenje tuđih riječi, a podstakao na odbranu časti muslimana, učinivši to razlogom spasa od Vatre. Poslanik, sallallahu alejhi ve sellem, rekao je: "Ko zaštiti čast svoga brata u njegovom odsustvu, Allah će ga obavezno osloboditi od Vatre." (Ahmed)

Ako to važi za obične muslimane, onda je u pogledu vlasti i učenjaka to još značajnije i važnije.

Poštovani vjernici!

Jedno od djela koja spašavaju na Sudnjem danu jeste čuvanje "trajnih dobrih djela" (el-bakijat es-salihah). Ebu Hurejra, radijallahu anhu, kazuje: "Bili smo kod Poslanika, sallallahu alejhi ve sellem, pa je rekao: 'Uzmite svoju zaštitu.' Rekli smo: 'Allahov Poslaniče, od neprijatelja koji je došao?' Rekao je: 'Ne, nego svoju zaštitu od Vatre: govorite: 'Subhanallah, elhamdulillah, la ilahe illallah, Allahu ekber' jer ove riječi na Sudnjem danu doći kao prethodnice i zaštitnice, i one su trajna dobra djela.'" (Nesai)

Također je Poslanik, sallallahu alejhi ve sellem, obavijestio o djelima koja spašavaju od Vatre: "Dvije oči neće dotaći Vatra: oko koje je plakalo iz straha od Allaha i oko koje je bdjelo na Allahovom putu." (Tirmizi)

To znači da kada čovjek razmišlja o Allahovoj veličini i svojoj manjkavosti, pa zaplače iz straha ili poštovanja – obećan mu je spas. Isto tako i onaj koji bdije čuvajući muslimane, ima nagradu i spas na Sudnjem danu.

Ako je to vrijednost u svim muslimanskim zemljama, kolika je tek u zemlji dva harema – njenoj zaštiti i službi.

Zatim, o vjernici, znajte da vam je Allah naredio uzvišenu stvar, počevši od Sebe: "Zaista Allah i meleki Njegovi donose salavat na Vjerovjesnika. O vjernici, donosite i vi salavat na njega i selam mu upućujte" (El-Ahzab, 56).

